

NO. SOALAN: 552

**PEMBERITAHUAN PERTANYAAN BAGI BUKAN JAWAB LISAN
DEWAN RAKYAT**

PERTANYAAN : BUKAN JAWAB LISAN

**DARIPADA : TUAN SHAMSUL ISKANDAR BIN MOHD AKIN
[BUKIT KATIL]**

RUJUKAN : 7323

SOALAN:

Tuan Shamsul Iskandar bin Mohd Akin [Bukit Katil] minta **MENTERI DALAM NEGERI** menyatakan sebab kenapa kanak-kanak tanpa kewarganegaraan yang semakin serius berlaku khususnya di Sabah dan Sarawak sehingga mencecah 14 ribu orang hanya dari tahun 2013 sehingga April 2014.

JAWAPAN:

Setiap kelahiran yang berlaku di Malaysia wajib untuk dilaporkan dan didaftarkan di Jabatan Pendaftaran Negara. Dalam hal ini, Jabatan Pendaftaran Negara menggunakan undang-undang yang termaktub di bawah tiga (3) akta yang memberikan peruntukan kepada Jabatan Pendaftaran Negara untuk mendaftarkan apa-apa kelahiran di Persekutuan termasuk di kalangan warga asing seperti berikut:

- i. Akta Pendaftaran Kelahiran dan Kematian 1957 (Akta 299) bagi Semenanjung Malaysia;
- ii. Ordinan Pendaftaran Kelahiran dan Kematian Bab 123 (No. 11 Tahun 1948) bagi Negeri Sabah; dan
- iii. Ordinan Pendaftaran Kelahiran dan Kematian Bab 10 (No. 6 Tahun 1951) bagi Negeri Sarawak.

Dalam hal ini, perlu diambil maklum bahawa pendaftaran kelahiran ini tidak akan memberikan taraf kewarganegaraan Malaysia secara automatik kepada kanak-kanak yang berkenaan kerana penganugerahan taraf kewarganegaraan Malaysia masih lagi tertakluk kepada peruntukan undang-undang di bawah Bahagian III Perlembagaan Persekutuan, status perkahwinan ibu bapa dan taraf kewarganegaraan ibu bapa semasa kanak-kanak dilahirkan. Perlembagaan Persekutuan juga telah menetapkan

bahawa kanak-kanak yang dilahirkan di Persekutuan tetapi perkahwinan ibu bapanya tidak didaftarkan di bawah undang-undang semasa yang berkuatkuasa dan ibunya juga bukan Warganegara Malaysia, maka anak akan direkodkan sebagai bukan seorang warganegara mengikut peruntukan undang-undang di bawah Seksyen 17 Jadual Kedua Bahagian III Perlembagaan Persekutuan. Oleh itu, ibu bapa kanak-kanak berkenaan perlulah menguruskan dokumen pengenalan diri anak mereka dengan kedutaan negara asal. Dakwaan yang menyebut bahawa terdapat 14 ribu kanak-kanak tanpa kewarganegaraan dalam tempoh setahun iaitu dari tahun 2013 sehingga April 2014 juga adalah tidak benar.